



BOSNA I HERCEGOVINA
PARLAMENTARNA SKUPŠTINA
ZASTUPNIČKI DOM

Komisija za ljudska prava, imigraciju, izbjeglice i azil

Broj: 01/5-011-1300/03

Sarajevo, 13.10.2003. godine

Z A P I S N I K

sa 7. sjednice Komisije za ljudska prava, imigraciju, izbjeglice i azil (u daljem tekstu: Komisija), održane 22.9.2003. godine, sa početkom u 10,00 sati.

Sjednici Komisije prisustvovali su:

- Elmir Jahić, predsjedatelj Komisije,
- Martin Raguž, prvi zamjenik predsjedatelja,
- Tihomir Gligorić, drugi zamjenik predsjedatelja,
- Nadžida Mlaćo, član Komisije,
- Miloš Jovanović, član Komisije,
- Ruža Sopta, član Komisije,
- Selim Bešlagić, član Komisije,
- Muhamed Altić, član Komisije.

Sjednici nije prisustvovao g. Munib Jusufović. Od gostiju, sjednici su prisustvovali: zastupnici koji su podnijeli amandmane na zakon: g. Ćeman Mirsad i g. Beriz Belkić; pomoćnik ministra za ljudska prava Bosne i Hercegovine g. Mario Nenadić i zamjenik Šefa Odjela za obnovu i rekonstrukciju u OHR-u, g. JaysonTaylor.

Za sjednicu je usvojen sljedeći

Dnevni red:

- 01. Usvajanje zapisnika 6. sjednice,**
- 02. Rasprava o Prijedlogu zakona o izbjeglicama iz BiH i raseljenim osobama u BiH,**
- 03. Izvješće podgrupe Komisije o predstavci grupe građana sa Tržnice Arizona,**
- 04. Tekuća pitanja.**

Ad. – 1. Usvajanje zapisnika sa **šeste sjednice Komisije.**

Nakon usvajanja dnevnog reda, predsjedatelj Komisije, Elmir Jahić predložio je raspravu i usvajanje zapisnika sa šeste sjednice.

O zapisnicima nije bilo diskusije.

Kako nije bilo diskusije, predsjedatelj Komisije predložio je usvajanje zapisnika, pa je Komisija jednoglasno usvojila zapisnik sa 6. sjednice Komisije.

Ad. – 2. Rasprava o Prijedlogu zakona o izbjeglicama iz BiH i raseljenim osobama u BiH,

U uvodnom izlaganju za drugu točku dnevnog reda predsjedatelj Komisije, Elmir Jahić, ukazao je na činjenicu da je ovlašteni predlagač zakona Vijeće ministara BiH dana 1.8.2003. godine dostavio Parlamentarnoj skupštini Bosne i Hercegovine Prijedlog zakona o izmjenama i dopunama Zakona o izbjeglicama iz Bosne i Hercegovine i raseljenim osobama u Bosni i Hercegovini (u daljem tekstu: Prijedlog zakona) radi razmatranja i usvajanja. Zastupnički dom Parlamentarne skupštine Bosne i Hercegovine je na 17. sjednici održanoj 7.8.2003. godine usvojio zahtjev Vijeća ministara BiH za razmatranje Prijedloga zakona po žurnom postupku u skladu sa člankom 104. Poslovnika Zastupničkog doma. Predsjedatelj Komisije je istakao da u skladu sa navedenim člankom Poslovnika rok za podnošenje izvještaja nadležne komisije (član 84. stav 2.) skraćuje se za pola, a taj rok danas ističe. On je ukazao da je Ustavno-pravna komisija Zastupničkog doma Parlamentarne skupštine Bosne i Hercegovine na 13. sjednici održanoj dana 3.9.2003. godine razmatrala Prijedlog zakona te aktom broj 01/1-011-1191/03 utvrdila postojanje valjanog ustavno-pravnog osnova za donošenje ovog zakona, sadržanog u članku IV. Tačka 4. a) u vezi sa člankom III točka 1. f) Ustava BiH, kako je naveo predlagač, te utvrdila da se ponuđeni tekst može uputiti nadležnoj komisiji u daljnju zakonodavnu proceduru. Predložio je da se na današnjoj sjednici Komisije, razmatraju principi i članovi (norme) predloženog zakona, kao i predloženi amandmani. Konstatirao je da je do početka sjednice na Prijedlog zakona uloženo nekoliko amandmana od zastupnika i to: g. Beriza Belkića, g. Mirsada Ćemana i g-đe Ruže Sopta. Predložio je raspravu.

U raspravi su učestvovali prisutni gosti, podnosioci amandmana i članovi Komisije.

G. Mario Nenadić, pomoćnik ministra za ljudska prava i izbjeglice BiH je istakao značaj predloženih izmjena i dopuna Zakona koji je donesen i primjenjuje se od siječnja 2000. godine. Na predložene amandmane se ne može očitovati jer ih nije ni dobio.

G. Tihomir Gligorić je istakao da predloženi amandmani donose kvalitet Zakonu. Istakao je da se neki ponuđeni amandmani malo međusobno sukobljavaju. Založio se za jaču participaciju Ministarstva za ljudska prava i izbjeglice BiH u rješavanju ove problematike, a priklonio se amandmanima koje je ponudio zastupnik Beriz Belkić. Predložio je i prihvatanje amandmana g-đe Ruže Sopta.

G. Beriz Belkić, kao predlagač određenih amandmana govorio je o njima i iskazao mogućnost da odustane od svog drugog amandmana, ukoliko se ponudi bolje rješenje.

G. Ćeman Mirsad je obrazlagao svoje amandmane. U njihovoj izradi, rukovodio se potrebom da Vijeće ministara BiH imenuje Povjerenstvo, a u članstvu Povjerenstva treba biti ministar Ministarstva za ljudska prava BiH. Ujedno se založio za rješenje da se o listi za izbor članova Povjerenstva glasa «u paketu», pa ako lista ne prođe da se radi nova.

G. Raguž je u svom obraćanju ukazao na motive donošenja Prijedloga zakona, kao i amandmana. On je tražio jačanje uloge Povjerenstva i smatra ispravnim prijedlog da Predsjedništvo BiH imenuje Povjerenstvo. Založio se za afirmaciju stanja u državi u kojem će ključne institucije BiH voditi najvažnije poslove kao i procese u vezi njih, jer to je budućnost BiH, pa je u tom smislu podržao amandmane g. Belkića i g-đe Sopta.

Diskusiji se pridružio i g. Jayson Taylor, zamjenik šefa Odjela za obnovu i rekonstrukciju u OHR, koji je ukazao na urgentnost donošenja izmjena i dopuna Zakona jer se njegova implementacija treba vršiti prije 1. siječnja iduće godine. Predložio je da se na

sjednici Zastupničkog doma procedura uprosti i provede spajanje prvog i drugog čitanja te zakon brzo donese.

G-đa Ruža Sopta je ostala pri uložnim amandmanima. Istakla je okolnost da je uloga Povjerenstva veoma važna u implementaciji Aneksa VII i zato predlaže da Predsjedništvo BiH izabere Povjerenstvo.

Svoje doprinose diskusiji iskazali su i drugi članovi Komisije. G. Bešlić je, podržavajući amandmane i rješenja pojedinih predlagača posebno ukazao na mjesto i ulogu općina u aktivnosti povratka izbjeglica i raseljenih lica.

Predsjedavajući Komisije, g. Jahić se i sam dotakao amandmana i iskazao im podršku, smatrajući potrebnim da se Komisija opredjeli na pravi način i da donese Prijedlog zakona.

Na temelju svestrane rasprave o ovom zakonu, Komisija je jednoglasno: podržala principe predloženog zakona, prihvatila navedene amandmane i prihvatila tekst Prijedloga zakona o izmjenama i dopunama Zakona o izbjeglicama iz Bosne i Hercegovine i raseljenim osobama u Bosni i Hercegovini i zaključila da je predloženi zakon neophodno donijeti odmah, te ga upućuje Zastupničkom domu Parlamentarne skupštine Bosne i Hercegovine u daljnju proceduru usvajanja. Pored teksta Prijedloga Zakona, Komisija je usvojila i slijedeće amandmane:

AMANDMAN I

U članku 23.a. stavak 2. brišu se riječi «u ime» i zamjenjuju riječima «uz suglasnost». U istom stavku, rečenica zadnja, brišu se riječi «Vijeće ministara» i zamjenjuju s riječi «Predsjedništvo». Takođe, u zadnjem stavku brišu se riječi «Vijeće Ministara» i zamjenjuju s riječi «Predsjedništvo».

U članku 23.a. stavak 2. iza teksta «a Vlada Brčko Distrikta BiH predlaže jednog člana Komisije» dodaje se nova rečenica koja glasi: «Ministar za ljudska prava i izbjeglice, obavezno je jedan od članova ispred Vijeća ministara Bosne i Hercegovine».

AMANDMAN II

U članku 24.a. dodaje se novi drugi stavak koji glasi: Direktor, predsjednik Povjerenstva i ministar Ministarstva za ljudska prava i izbjeglice trebaju biti predstavnici iz reda sva tri konstitutivna naroda Bosne i Hercegovine»

AMANDMAN III

U članku 24.b. stavak 2. brišu se riječi «Konsultacije sa Povjerenstvom» i zamjenjuju riječima «saglasnost Povjerenstva».

AMANDMAN IV

Članak 30. koji postaje članak 27. u okviru članka 12. Prijedloga zaklona, zamjenjuje se i glasi:
«Ovaj zakon stupa na snagu 8 dana od dana objavljivanja u «Službenom glasniku Bosne i Hercegovine».

Sukladno članokm 89. Poslovnika Zastupničkog doma Parlamentarne skupštine Bosne i Hercegovine, Komisija je za izvjestioca odredila predsjedatelja Komisije Elmira Jahića.

Ad. - 3. Izvješće podgrupe Komisije o predstavlci grupe građana sa Tržnice Arizona,

G-da Ruža Sopta je detaljno informirala članove Komisije o radu podgrupe za predstavku građana s Tržnice Arizona. Podgrupa je imala svoj sastanak na kojem je razmatrala problem te zaključila da je neophodno provjeriti određene navode kod organa Brčko Distrikta, kao i kod podnositelja predstavke i s njima provjeriti aktuelnost ovog slučaja. Na temelju tih utisaka i sakupljene dokumentacije, ona će donijeti svoje zaključke.

Ad. – 4. Tekuća pitanja.

U ovoj točki dnevnog reda, predsjedatelj Komisije je inicirao određene izmjene i dopune ranije donesenih Zaključaka o Strategiji za sprovođenje Aneksa VII Dejtonskog sporazuma. U diskusiji su učestvovali zastupnici: Selim Bešliagić, Muhamed Altić, Ruža Sopta i Tihomir Gligorić.

Zaključeno je da se u zaključku broj 7c ranije formuliranih zaključaka, učini ispravka, tako da umjesto ranijeg teksta, novi tekst zaključka 7c glasi:

“- istaknuti određene oblasti i regije BiH kao prioritete pomoći u povratku, a na temelju utvrđenih kriterijuma, kao što su: zainteresovanost za povratak, zapostavljenost u dodjeli dosadašnje pomoći, kao i drugih kriterijuma koje će definirati Vijeće ministara, na prijedlog Povjerenstva za izbjeglice i raseljena lica,”

Zastupnik Selim Bešliagić je predložio, a što je jednoglasno usvojeno od članova Komisije, da se izvrši posjeta Crnom vrhu i drugim značajnijim lokacijama, masovnim grobnicama i mjestima sakupljanaj ostataka žrtava rata. Na osnovu izvještaja sa obilazaka da se sačini akt Komisije sa porukom kako pomoći ustanovljenim povjerenstvima i pojedincima koji traže nestale osobe.

Završavajući ovu točku dnevnog reda, Komisija je završila 7. sjednicu. Sjednica je završena u 12,40 sati.

TAJNIK KOMISIJE

dr Zijad Hasić

PREDSJEDATELJ KOMISIJE

Elmir Jahić